

REGIONAL NEWS

UNIT

ALL INDIA RADIO, AGARTALA

Date:08-06-2024

Time: 07.35-07.40 AM Hrs

BENGALI MORNING BULLETIN

PM- oath :

বরিশি বিজেপি নেতা নরেন্দ্র মোদী আগামীকাল প্রধানমন্ত্রী হিসেবে শপথ গ্রহন করবেন। ঐদিন সন্ধ্যা ৭ টা ১৫ মিনিটে রাষ্ট্রপতি ভবনে শপথ গ্রহন অনুষ্ঠান হবে। রাষ্ট্রপতি ভবনের সচিবালয় থেকে জানানো হয়েছে, প্রধানমন্ত্রী ছাড়াও তাঁর মন্ত্রিসভার অন্যান্য সদস্যরা শপথ নেবেন। গতকাল এনডিএ নেতৃবৃন্দ রাষ্ট্রপতির সঙ্গে সাক্ষাৎ করে সরকার গঠনের দাবি পেশ করেন। নতুনদিল্লিতে এনডিএ সংসদীয় দলের বৈঠকে বরিশি বিজেপি নেতা এবং কেন্দ্রীয় মন্ত্রী রাজনাথ সিং শ্রী মোদিকে এনডিএ নেতা হিসাবে নির্বাচিত করার প্রস্তাব উত্থাপন করেন এবং বিজেপি সহ সব শরিকদল প্রস্তাব সমর্থন করে।

Governor visit :

রাজ্যপাল ইন্দ্রসেনা রেডি নাল্লু গতকাল আগরতলায় ৫৭ মাউন্টেন আর্টিলারি ব্রিগেড পরিদর্শন করেন। উপস্থিত ছিলেন আর্টিলারি ব্রিগেডের কমান্ডার ব্রিগেডিয়ার বিকে পাল্ডা। রাজ্যপাল শ্রী নাল্লু সেনাবাহিনীর জওয়ানদের সঙ্গে আলোচনা করেন। তিনি দেশের নিরাপত্তায় সেনাবাহিনীর গুরুত্বপূর্ণ ভূমিকার জন্য

অভিনন্দন জানিয়েছেন। তিনি ত্রিপুরার যুবকদের সেনাবাহিনীতে যোগদান করার অন্য আহ্বান করেছেন। রাজভবন সুত্রে এই খবর।

CM- JAY 2023 :

মুখ্যমন্ত্রী জন আরোগ্য যোজনায় রাজ্যের সমস্ত সরকারি হাসপাতাল, হাপানিয়ার ত্রিপুরা মেডিক্যাল কলেজ সহ ১৩১টি হাসপাতালে সুবিধাভোগীরা নগদহীন চিকিৎসা পরিষেবা পাচ্ছেন। টিএইচপিএস, স্টেট হেলথ এজেন্সি গতকাল এক বিবৃতিতে জানিয়েছে, এই প্রকল্পে এখন পর্যন্ত ১ লক্ষ ৮৫ হাজার ১৯৩ পরিবারের ৪ লক্ষ ৯ হাজার ৮১৩ জন সুবিধা পেয়েছেন। রাজ্যের বিভিন্ন তালিকাভুক্ত হাসপাতালে সুবিধাভোগীদের প্রধানমন্ত্রী জন আরোগ্য যোজনা অথবা মুখ্যমন্ত্রী জন আরোগ্য যোজনা - ২০২৩ প্রকল্পের আওতায় ভর্তি নিশ্চিত করা হচ্ছে।

Yoga Day- National :

তথ্য ও সম্প্রচার এবং আয়ুষ মন্ত্রক আন্তর্জাতিক যোগ দিবস ২০২৪ উদযাপনের প্রস্তুতি শুরু করেছে। তথ্য ও সম্প্রচার মন্ত্রকের সচিব সঞ্জয় জাজু এবং আয়ুষ মন্ত্রকের সচিব বৈদ্য রাজেশ কোটেচা গতকাল নতুন দিল্লিতে এই প্রস্তুতি পর্যালোচনা করেন। তথ্য ও সম্প্রচার মন্ত্রকের মিডিয়া ইউনিটগুলি যোগ চর্চার সাধারণ নিয়মাবলী এবং যোগ অনুশীলনের উপকারিতা সম্পর্কে সচেতনতা তৈরি করতে বিভিন্ন অনুষ্ঠানের প্রস্তুতি নিচ্ছে।

প্রসার ভারতী দূরদর্শন ও আকাশবাণী নেটওয়ার্কের মাধ্যমে বিভিন্ন অনুষ্ঠান সম্প্রচার করবে। দূরদর্শন সকালে সরাসরি বিশেষ সম্প্রচারের পাশাপাশি যোগ বিশেষজ্ঞদের সঙ্গে সাক্ষাৎকার সম্প্রচার করবে।

Yoga Day- State :

এদিকে, আগামী ২১শে জুন হাঁপানিয়াস্থিত আন্তর্জাতিক প্রদর্শনী হলে রাজ্যভিত্তিক দশম আন্তর্জাতিক যোগ দিবস উদযাপন করা হবে। এ উপলক্ষে গতকাল আগরতলায় যুব বিষয়ক ও ক্রীড়া দপ্তরের কার্যালয়ে এক প্রস্তুতি সভায় অতিরিক্ত জেলাশাসক প্রশান্ত বাদল নেগি জানান, এবারের রাজ্যভিত্তিক আন্তর্জাতিক যোগা দিবসের মূল অনুষ্ঠানে একসঙ্গে ২ হাজার ৭৫০ জন যোগ প্রদর্শন করবেন।

TSECL corporation :

ত্রিপুরা স্টেট ইলেকট্রিসিটি কর্পোরেশন লিমিটেডের নতুন ব্যবস্থাপক অধিকর্তা হিসেবে যোগ দিয়েছেন ন্যাশনাল হাইড্রো পাওয়ার কর্পোরেশন লিমিটেডের প্রাক্তন অধিকর্তা ইঞ্জিনিয়ার বিশ্বজিৎ বসু। তিনি ত্রিপুরা রাজ্য বিদ্যুৎ নিগম লিমিটেডের ভারপ্রাপ্ত ব্যবস্থাপক অধিকর্তা দেবশীষ সরকারের স্থলাভিষিক্ত হয়েছেন। ইঞ্জিনিয়ার শ্রী বসু ত্রিপুরা ইঞ্জিনিয়ারিং কলেজ (বর্তমানে এনআইটি, আগরতলা) থেকে ইলেকট্রিক্যাল ইঞ্জিনিয়ারিং এর স্নাতক। ত্রিপুরা ইঞ্জিনিয়ারিং কলেজ বর্তমানে ন্যাশনাল ইনস্টিটিউট অফ টেকনোলজির প্রাক্তন ছাত্র বিশ্বজিৎ

বসু ত্রিপুরা রাজ্য বিদ্যুৎ নিগম লিমিটেডের শীর্ষ পদে অনুষ্ঠিত
হওয়ায় খুশি রাজ্যের ইঞ্জিনিয়াররা।

Up gradation of School :

রাজ্যে মাধ্যমিক স্তরের আরও ১৬টি বিদ্যালয়কে উচ্চ মাধ্যমিকে
উন্নীত করা হয়েছে। শিক্ষা দপ্তরের অধিকর্তা নৃপেন্দ্র চন্দ্র শর্মা
এক বিজ্ঞপ্তিতে জানিয়েছেন, চলতি ২০২৪-২৫ অর্থ বছর থেকেই
এই বিদ্যালয়গুলিতে উচ্চ মাধ্যমিকে কলা বিভাগে ভর্তি নেওয়া
হবে। এই স্কুলগুলির মধ্যে সিপাহিজলায় চারটি, পশ্চিম জেলায়
চারটি, গোমতী জেলায় তিনটি, উত্তর জেলায় তিনটি, দক্ষিণ ও
উনকোটি জেলায় একটি করে বিদ্যালয়কে উচ্চ মাধ্যমিকে উন্নীত
করা হয়েছে।

Food Grains, Petrol :

রাজ্যে নিয়মিতভাবে খাদ্য সহ বিভিন্ন পণ্য সরবরাহ অব্যাহত
রয়েছে। খাদ্য অধিকর্তা নির্মল অধিকারী জানিয়েছেন, রাজ্যে
বর্তমানে ৭৮ দিনের চাল ও ১০০ দিনের গম মজুত রয়েছে।
এছাড়া ১০ দিনের পেট্রোল ও ৬ দিনের ডিজেল মজুত রয়েছে।
তিনি জানান, বাজারে বিভিন্ন নিত্য প্রয়োজনীয় পণ্যের মজুত ও
মূল্যস্তর নিয়ন্ত্রণে দপ্তরের নজরদারী রয়েছে।

Recovery of pistol :

বিএসএফ এবং পুলিশের যৌথ অভিযানে গতকাল আমতলি থানার অন্তর্গত মতিনগর সীমান্ত এলাকা থেকে ৪০ হাজার ইয়াবা ট্যাবলেট ও একটি পিস্তল উদ্ধার করা হয়। নেশা সামগ্রী ও আগ্নেয়াস্ত্র মজুত রাখার দায়ে একজন পাচারকারীকে গ্রেপ্তার করা হয়। পশ্চিম জেলার পুলিশ সুপার কিরন কুমার কে সাংবাদিকদের এখবর জানান।

Accident death :

গতকাল খোয়াই থানার অন্তর্গত উত্তর চেবরিতে বাইক দুর্ঘটনায় মারা গেছেন ৪৫ বছরের এক মহিলা। পুলিশ জানিয়েছে, মৃতার নাম কল্পনা দেববর্মা। তিনি স্বামীর সঙ্গে বাইকে যাওয়ার পথে দুর্ঘটনায় পড়ে আহত হন। গুরুতর অবস্থায় তাকে খোয়াই জেলা হাসপাতালে নেওয়া হয়। সেখান থেকে জিবি হাসপাতাল নেওয়ার পর মারা যান শ্রীমতি দেববর্মা।

Women's Cricket :

টিসিএ পরিচালিত সদরের আন্তঃস্কুল মেয়েদের টি-২০ ক্রিকেটে আজ তিনটি খেলা হবে। নরসিংগড়ের পিটিএ মাঠে সকালে আসাম রাইফেলস পাব্লিক স্কুল খেলবে প্রাচ্য ভারতী স্কুলের বিরুদ্ধে। পরে দুপুরে একই মাঠে প্রণবানন্দ বিদ্যামন্দির খেলবে বড়দোয়ালি স্কুলের বিরুদ্ধে। অপরদিকে নরসিংগড়ের পঞ্চায়েত মাঠে বিদ্যাসাগর স্কুল খেলবে নন্দনগর স্কুলের বিরুদ্ধে।

Aaradhya in Asian Chess:

এশিয়ান দাবায় অংশ নিতে আজ কাজাকিস্তানে যাচ্ছে রাজ্যের উদীয়মান আন্তর্জাতিক দাবাড়ু আরাধ্যা দাস। আগামীকাল থেকে শুরু হবে এশিয়ান অনূর্ধ্ব-১০ বছরের দাবা প্রতিযোগিতা। চলবে ২১ জুন পর্যন্ত। র্যাপিড, ব্লিটস এবং ক্লাসিক্যাল- ওই তিন বিভাগে অংশ নেবে আরাধ্যা। গত বছরের নভেম্বরে ঝাড়খন্ডে অনুষ্ঠিত অনূর্ধ্ব-৯ বছরের জাতীয় দাবায় নবম স্থান দখল করেছিলো আরাধ্যা।

Weather :

আজ দুপুর পর্যন্ত আবহাওয়ার পূর্বাভাসে জানানো হয়, আকাশ সাধারণত: মেঘলা থাকবে। বজ্র বিদ্যুৎ সহ বিক্ষিপ্তভাবে হালকা থেকে মাঝারি ধরনের বৃষ্টি হতে পারে। দিনের সর্বোচ্চ তাপমাত্রা থাকবে ৩৪ ডিগ্রির কাছাকাছি। আগরতলায় আজ সকালে সর্বনিম্ন তাপমাত্রা ছিল ২৪.১ ডিগ্রী সেলসিয়াস। ভোর সাড়ে ৫টা পর্যন্ত বৃষ্টি হয়েছে ১০.৫ মিলিমিটার।
